

四

明

叢書

張宗祥



00
2
10

春酒堂文存卷二

遺書一之二

鄞周容鄧山撰

慈谿馮貞羣孟顓編

碑

董孝子廟碑

莫不人父母也指一人以不孝必怫然怒指一人以孝
又必歎焉辭豈孝與不孝出入間別有兩持中立之塗
可隱芑多人者乎否則堯廷無不孝臣而大舜獨孝名
何以處皋夔孔門無不孝士而閔損獨孝名何以處回

賜然則古之獨以孝名者皆人子不幸者也人子以父母身事父母顏色語笑飲食起居至常也原無可以驚眾動俗惟變當於至難迹處乎莫諱於是天下後世莫不聞風感歎而旌揚之尸祝之非爲孝子慰也欲使聞風感歎者各還顧其身而自幸所處則天下後世當無一非孝子夫以孝名天下後世非孝子初心而使天下後世因之而無一非孝子又孝子至願若漢徵君董公固已幸而無舜與損之不幸者也觀公母頻述公孝行於王寄母則可知其慈矣以徵君而事慈母顏色語笑

飲食起居天倫之樂至於相忘公不自知孝名何義天下後世亦不必用孝名公豈不俯仰裕如快然自足而天故變其事以大公名驚動乎天下後世見舜與損之外有幸遇慈親復不幸而有孝名如此者然公心益不自安矣曰某以顏色語笑飲食起居事母甚常不足使王寄化反致使吾母死某不孝不可與寄共天下然寄固讎又不可以讎寄并讎寄母因俟寄母終而後斬寄則公之於寄猶不欲使爲不孝子者其欲天下後世皆不爲不孝子意甚慤也詩曰孝子不匱永錫爾類公之

龔煌煌雙詔至今蟠龍歲六月六祀潔且豐俎豆圭璧
笙簧鼓鐘凡百士庶莫敢不恭徵君曰吁各反爾躬予
實不幸以罹鞠凶千秋億禩予愧予恫在室爾姥在堂
爾翁攜妻將子朝飡夕饗其忘孝名孝在其中歸各有
廟我心融融

三聖廟碑

杭城西偏舊有廟祀關壯繆配以火馬二神顏曰三聖
廟從俗也夫壯繆名氏爵位與生平事蹟歷代崇祀昭
昭耳目無庸稱述者矣而火馬二神罔所攷據道書所

傳或幾於誕大率二神爲虛署如人間部寺之類凡仕朝者各得以陞遷而主之然則安知壯繆不嘗主火馬二神耶夫漢兆赤帝以火德王壯繆矢心炎劉期嘯其燼則主火神也固其樂爲之者矣而馬則上應房宿爲行軍所重故祭曰禡祭周官於統六師者亦曰司馬壯繆一生崎嶇兵間卽或主馬神也亦未爲不可然則三聖固一聖也而曰三聖廟從俗也壯繆廟徧宇內其廟於此也莫考由來其合二神而廟於此也莫攷何意蓋里俗之於鬼神忽焉感通如童謠然多不可以常理測

然無非邀神庇以祈免一方之災癘也舊宇湫隘不足以竦瞻仰而起恭敬於是善信等醵金庀工卑者以矗隘者以廓翼以垣墉塗以丹牖高明景融耳目煥若千秋勿替以禋以粦月日落成屬予記之而系以迎神送神之詞詞曰

天門闢兮朱旗導赤蚪兮文龜左天駟兮右熒惑中美髣兮風吹望分明兮來過雲罨靄兮奈何問靈保兮忽不見日將晚兮湖波右迎神炙笙兮伐鼓明庭燎兮翻舞神不我拒兮謂尸勞苦牲既潔兮酒清卮爲醕兮七舉

相酬勸兮互主賓神既醉兮語且顰此邦之人兮不戒
火四郊馬血兮成燐嗣今兮爾祐楓葉秋兮杏春比屋
兮爨朝暮歸華陽兮無塵

右降神

驂駕兮嘶鳴旌連蜷兮

雲生神欲歸兮屢回顧羌後期兮易誤仰縹緲兮龍樓
聚百靈兮咨謀憫九有兮愁苦民生盡兮豺虎操鞭弭
兮驅之肯眷此兮遲遲

右送神

賀祕監祠碑

古來翱翔天闕履順蹈亨而鑒分止足投老林泉者自
漢二疏外未有聞也至唐有吾鄉賀公公是時爲太子

賓客祕書監監丞上無鵠羽集樹之憂旁無飄風南北
之恐乃一旦致其仕去天子灑宸翰以寵行百官帳青
門以祖道莫不咨嗟欣嘅謂繼二疏而遂志者其公也
耶脫我蟬冕倏爾黃冠卸我紫衣忽焉野服馬首東邁
鴻遠天空豈不謂賢哉至考公當年固已年七十餘矣
七十而懸車人臣之分也然按唐史柬之七十餘尙爲
尉李邕以陳州刺史來朝亦七十餘矣眞卿八十爲刑
部尙書見唐制忠厚加恩禮下不立引年之例以崇老
成之風諸公遂自忘其耄而人亦相與習之歟夫以諸

公之才之德雖耄足以樹勲業植名節爲朝廷重而持
祿固位者皆依附以自通其陋至朝謁失儀顛踣殿陛
猶覩不知愧豈非爲人心風俗大患故公毅然決志無
少遲疑於以震聳觀聽砥礪廉隅謂裨益世道豈淺鮮
哉公歸未幾奚雛煽燼凝碧之慟有伶官而僞署之免
惟司業使公猶未歸必有足爲朝廷重者何也公能遺
榮於承平必不蠖名於篡逆也又安知公之歸也非有
見於赤狐黑烏而託之鱸魚莼菜者乎借帝宮之夢遊
示北風之雨雪使朝廷因其去而思危推其心而知戒

則公之歸更勝於二疏多多矣公吾郡人也吾郡以公爲重乃郡志列公隱逸傳中舊碑所稱率以清風高節與子陵元亮比恐非公所樂受也古今寧有官祕書年七十而可稱隱逸者公之賢自足爲吾郡重而奚必以隱逸增重哉因拜公祠爲辯之而書於碑用告後來修郡志者祠在郡城月湖西系以詩曰

文采風流兮潤皇唐出處行藏兮光故鄉公之歸兮臣節用章列公隱逸兮公不受臣年七十兮歸已後金魚玉珮兮榮已久公識李白兮千古氣張蹴踏奴隸兮天

子中璫直斥華清兮禍水昭陽鑑湖清兮機槍午下殿
走兮淋鈴雨公之歸兮臣心苦李識郭兮猶公識李唐
興復兮由此人生難兮知己我遊湖涘兮日西頽公九
原兮不復回庭柏折兮寒鴉來

賀成廟碑

賀成廟者唐太子賓客禮部尙書賀公廟也公實用祕
書監丞致仕而尙書爲贈官故鄉俗多稱賀丞焉然則
廟宜賀丞矣而曰成訛相傳而題額誤也廟在甬江東
南里人章光祺嘗引容謁廟指額示容曰丞之訛爲成

也祺幸託斯里而猶未及改正以至於今容曰公仕唐
固丞也竟遺榮慕道湖山棲老視丞如浮雲然公原不
欲以丞自重則後之人又何假一丞重公春秋之法不
書官貶之也朱子遵其例爲綱目有因賢而備書其官
者若祠廟題額固無取褒貶例也月湖西相傳爲公故
宅今爲廟題曰唐賀祕監祠豈卽所謂千秋觀遺址歟
而此廟之立莫攷奚自意者公少時讀書嘗游止於是
又或致仕歸杖履曾一再憩焉後遂慕想而爲之歟試
偕子出門倚徙四望平疇遠風相接廬舍籬落點染炊

烟雖無畫橋漁艇柳浪聞亭如月湖之勝而塍界水縈
潮汐不及亦吾郡沃壤也冬之時二麥工畢犢健土深
以及於春秧黃秧綠拋秧插秧老穉餉饁農歌互起公
應樂見之至於夏也桑柘影中桔槔斷續雨淫日酷晚
禾而芸公又惻然見焉凡此皆民之勤生計而期於秋
以有成也幸及於秋穗垂首矣葉有聲矣於焉以鉦以
耒以蹂以碓遺滯之利旁惠孀單而乃釀醴割牲叩鉦
擊缶遠近扶攜就公廟以肅享祀者感辛勤之獲報而
賀秋事之有成也公進士登第出入金馬賦詩飲酒超

然塵外歿亦必侍帝香案逍遙紫極寧屑屑不厭猥瀆
而與田祖伍則農事之成不成公不任受咎亦不任受
賀矣雖然謂逸才之士率文采自喜高意肆志於民事
膜外視之者此鄙夫妄說也公蓋嘗令任城矣流風遺
愛百世祠祀不絕公豈視民事膜外者況此又公桑梓
地乎公其念彫剋餘民宜加存卹勿縱螟螣助彼貪吏
勿聽燥潦滋爾盜心俾歲歲有成以相賀也甫田之卒
章曰農夫之慶報以介福豈非公之大有惠於桑梓地
哉然則廟額之訛承而成也或亦公所欣然而不致深

責者也夫金銀伏獵固以不學蒙譏漱石枕流未嘗不以明通資辨亦賀成義也光祺曰然遂作文記之而系以詩詩曰

公佩金龜青宮侍讀公乞黃冠優游野服公去千年鑑湖仍綠今儼在斯鄉音猶熟 前畦後畔左壤右塗公在其間憫此農夫酌彼雨暘均我黍稌稂莠是穢蝨賊是屠 歲際豐年家取十千有雞有鶩有縱有豨婦子以孝兄弟以賢克展禋祀神保無愆 白馬畫輪玄裳朱黼絳旗繡裳蘭燈樺炬公出行遊導以田祖彷彿歸

來厨幔風舉 薦芷升香傳芑侑觴我蓑我笠我冠我
裳以興嗣歲錫祐無疆勿我鄙夷是公之鄉

里中睢陽祠碑

睢陽古郡治以唐張中丞死守著名今隸河南爲歸德
府去鄴遠程里計者凡幾憶容數歲聽家大人講通鑑
知唐有張中丞守睢陽事間隨行里閭見睢陽祠大人
指示曰此祠卽通鑑所云張中丞者也入拜謁徘徊不
忍去頻索問睢陽何處若恨不得身卽到焉長出遊未
及至睢陽登樓櫓想像公當日指揮忼慨聞笛賦詩如